



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

18.08.2020թ.

## Ո Ր Ո Շ ՈՒ Մ

### ՀՀ գնումների հետ կապված բողոքներ քննող անձի թիվ ԳԲՔԱ-ՆԳ-2020/66

Հայաստանի Հանրապետության գնումների հետ կապված բողոքներ քննող անձը՝ ի  
դեմս Գրիգոր Ներսիսյանի,

Մասնակցությամբ

«Աբամա Թրեյդ» ՍՊԸ-ի տնօրեն

Է.Փոթոյանի (պետական գրանցման վկայական թիվ 273.110.1125342),

քննելով «Վ.Ա. Ֆանարջյանի անվան ուռուցքաբանության ազգային կենտրոն» ՓԲԸ-ի  
կարիքների համար դեղորայքի ձեռքբերման նպատակով հայտարարված «ՈւԱԿ-  
ԲՄԱՊՁԲ-20/65» ծածկագրով բաց մրցույթի շրջանակներում «Աբամա Թրեյդ» ՍՊԸ-ի  
կողմից 30.07.2020թ. ներկայացված (30.07.2020թ. վարույթ ընդունված) բողոքը և  
30.07.2020թ. ներկայացված (31.07.2020թ. վարույթ ընդունված) համանման բողոքը  
(հետայսու նաև՝ ԳԲՔԱ-ՆԳ-2020/66 բողոք) և կից փաստաթղթերը, պարզեցի հետևյալը.

**1. «Աբամա Թրեյդ» ՍՊԸ-ի կողմից ներկայացված փաստերը, հիմնավորումները և  
պահանջը.**

«Աբամա Թրեյդ» ՍՊԸ-ն (հետայսու նաև՝ Ընկերություն) 30.07.2020թ. ներկայացված  
բողոքով հայտնել է հետևյալը.

«Վ.Ա.Ֆանարջյանի Անվան ուռուցքաբանության ազգային կենտրոն» ՓԲԸ-ն հայտարարել է «ՈՒԱԿ-ԲՄԱՊՁԲ-20/65» ծածկագրով դեղորայքի մատակարարման բաց մրցույթ, որին մասնակցել է նաև «Աբամա Թրեյդ» ՍՊԸ-ն և համաձայն 15.06.2020թ-ի թիվ 4 արձանագրության՝ 1-ին, 4-րդ և 5-րդ չափաբաժինների մասով ճանաչվել է ընտրված մասնակից:

Գնման գործընթացը իրականացվել է Գնումների մասին ՀՀ Օրենքի 15-րդ հոդվածի 6-րդ մասի հիման վրա:

Սույն թվականի հունիսի 30-ին պատվիրատուն ներկայացրել է պայմանագրի նախագիծը և պայմանագիր կնքելու առաջարկը՝

Մեջբերում.

«Կատարելով Գնումների մասին ՀՀ Օրենքի 36 հոդվածի պանջները հայտնում ենք Ձեզ, որ Վ. Ա. Ֆանարջյանի անվան ուռուցքաբանության ազգային կենտրոն ՓԲԸ-ի կողմից կազմակերպված «ՈՒԱԿ-ԲՄԱՊՁԲ-20/65» ծածկագրով գնման ընթացակարգի արդյունքում սույն ծանուցմանը կից պայմանագրի նախագծում նշված չափաբաժինների մասով հաղթող է ճանաչվել Ձեր կազմակերպությունը:

Ելնելով վերոգրյալից Ձեզ ենք ներկայացնում պայմանագրի նախագիծը և հայտնում ենք, որ հարկավոր է պայմանագիրը կնքել և կից գրությամբ ներկայացնել «Վ. Ա. Ֆանարջյանի անվան ուռուցքաբանության ազգային կենտրոն» ՓԲԸ»:

Էլեկտրոնային փոստի միջոցով մեզ առաջարկվել է կնքել միայն պայմանագիր:

Կից ներկայացնում ենք պայմանագիր կնքելու առաջարկը:

Պատվիրատուն ոչ 30.06.2020թ-ին, ոչ էլ բողոքի առարկա դարձած թիվ 5 արձանագրության հրապարակման պահին իրավունք չունեի ուղարկելու մեզ համաձայնագրի նախագիծ, քանի դեռ սահմանված կարգով չի կատարել փոփոխություն իր գնումների պլանում:

Փաստենք, որ սահմանված ժամկետում մեր կողմից կնքվել է պայմանագիրը և ներկայացվել պատվիրատուին:

22.07.2020թ-ին Պատվիրատուն իր թիվ 5 արձանագրությունով ապօրինաբար զրկել է մեր կազմակերպությանը 1-ին, 4-րդ և 5-րդ չափաբաժինների մասով պայմանագիր կնքելու իրավունքից:

ա. Նախ, Պատվիրատուն մեզ չի ծանուցել համաձայնագիր կնքելու վերաբերյալ, ինչը ապացուցվում է կցված փաստաթղթով /ծանուցում պայմանագիր կնքելու վերաբերյալ/:

բ. Երկրորդ, համաձայն ՀՀ կառավարության 04.05.2017թ-ի թիվ 526-Ն որոշման 18-րդ կետի՝ Օրենքի 15-րդ հոդվածի 6-րդ մասի համաձայն գնում կատարվելու դեպքում գնումների պլանում գնման առարկան ներառվում է առանց գնման ընդհանուր գումարի նշման՝ ֆինանսական միջոցներ նախատեսվելուց հետո գնման պլանում համապատասխան լրացում կատարելու պայմանով: Ընդ որում, համապատասխան ֆինանսական միջոցներ նախատեսվելու օրվան հաջորդող երկու աշխատանքային օրվա ընթացքում պատվիրատուն սահմանված կարգով փոփոխություն է կատարում գնումների պլանում, իսկ պայմանագրով նախատեսված ապրանքների մատակարարման, աշխատանքների կատարման կամ ծառայությունների մատուցման նպատակով համաձայնագիր կնքելու ծանուցումը և կնքվելիք համաձայնագրի նախագիծը պայմանագիրը կնքած անձին է ուղարկում գնումների պլանում փոփոխությունը կատարվելու օրվանից տասնհինգ աշխատանքային օրվա ընթացքում:

Քանի որ պատվիրատուն սահմանված կարգով փոփոխություն չի կատարել իր գնումների պլանում, հետևաբար իրավունք չունի ուղարկելու մեզ համաձայնագրի նախագիծ:

Կից ներկայացնում ենք պատվիրատուի գնումների պանը, որտեղ հստակ երևում է, որ 1-ին, 4-րդ և 5-րդ չափաբաժինների մասով դեռևս ֆինանսական միջոցներ նախատեսված չեն, հետևաբար անգամ խոսք գնալ չէր կարող համաձայնագիր կնքելու վերաբերյալ:

22.07.2020թ-ին Պատվիրատուն իր թիվ 5 արձանագրությունով ապօրինաբար գնման ընթացակարգի ընտրված մասնակից է ճանաչել 4-րդ չափաբաժնի մասով «Վիգ Ֆարմ» ՍՊԸ-ին և 5-րդ չափաբաժնի մասով «Գեղամ Կիրակոսյան» ՍՊԸ-ին»:

Ամփոփելով վերոգրյալը՝ Ընկերությունը խնդրել է.

ա. անվավեր ճանաչել պատվիրատուի թիվ 5 արձանագրությունով 4-րդ և 5-րդ չափաբաժինների մասով վերոնշյալ կազմակերպություններին ընտրված մասնակից ճանաչելու որոշումը, քանի որ պատվիրատուի 5-րդ արձանագրությունով կայացրած որոշումները ապօրինի են և վերոնշյալ կազմակերպությունները հանդիսանում են 2-րդ տեղ զբաղեցրած մասնակիցներ,

բ. պարտադրել պատվիրատուին 4-րդ և 5-րդ չափաբաժինների մասով պայմանագիր կնքել «Աբամա Թրեյդ» ՍՊԸ-ի հետ:

Ընկերության կողմից 30.07.2020թ. ներկայացվել է համանման բողոք, որով վերջինս հայտնել է հետևյալը.

«Վ.Ա.Ֆանարջանի անվան ուռուցքաբանության ազգային կենտրոն» ՓԲԸ-ն հայտարարել է «ՈՒԱԿ-ԲՄԱՊՁԲ-20/65» ծածկագրով դեղորայքի մատակարարման բաց մրցույթ, որին մասնակցել է նաև «Աբամա Թրեյդ» ՍՊԸ-ն և համաձայն 15.06.2020թ-ի թիվ 4 արձանագրության 1-ին, 4-րդ և 5-րդ չափաբաժինների մասով ճանաչվել է ընտրված մասնակից:

Գնման գործընթացը իրականացվել է «Գնումների մասին» ՀՀ Օրենքի 15-րդ հոդվածի 6-րդ մասի հիման վրա:

Սույն թվականի հունիսի 30-ին պատվիրատուն ներկայացրել է պայմանագրի նախագիծը և պայմանագիր կնքելու առաջարկը՝

Մեջբերում.

«Կատարելով «Գնումների մասին» ՀՀ Օրենքի 36-րդ հոդվածի պահանջները հայտնում ենք Ձեզ, որ Վ. Ա. Ֆանարջանի անվան ուռուցքաբանության ազգային կենտրոն ՓԲԸ-ի կողմից կազմակերպված «ՈՒԱԿ-ԲՄԱՊՁԲ-20/65» ծածկագրով գնման ընթացակարգի արդյունքում սույն ծանուցմանը կից պայմանագրի նախագծում նշված չափաբաժինների մասով հաղթող է ճանաչվել Ձեր կազմակերպությունը:

Ելնելով վերոգրյալից Ձեզ ենք ներկայացնում պայմանագրի նախագիծը և հայտնում ենք, որ հարկավոր է պայմանագիրը կնքել և կից գրությամբ ներկայացնել «Վ. Ա. Ֆանարջանի անվան ուռուցքաբանության ազգային կենտրոն» ՓԲԸ:

Էլեկտրոնային փոստի միջոցով մեզ առաջարկվել է կնքել միայն պայմանագիր:

Կից ներկայացնում ենք պայմանագիր կնքելու առաջարկը:

Պատվիրատուն ոչ 30.06.2020թ-ին, ոչ էլ բողոքի առարկա դարձած թիվ 5 արձանագրության հրապարակման պահին իրավունք չունեի ուղարկելու մեզ համաձայնագրի նախագիծ, քանի դեռ սահմանված կարգով չի կատարել փոփոխություն իր գնումների պլանում:

Փաստենք, որ սահմանված ժամկետում մեր կողմից կնքվել է պայմանագիրը և ներկայացվել պատվիրատուին:

22.07.2020թ-ին Պատվիրատուն իր թիվ 5 արձանագրությունով ապօրինաբար զրկել է մեր կազմակերպությանը 1-ին չափաբաժինների մասով պայմանագիր կնքելու իրավունքից:

ա. Նախ, Պատվիրատուն մեզ չի ծանուցել համաձայնագիր կնքելու վերաբերյալ, ինչը ապացուցվում է կցված փաստաթղթով /ծանուցում պայմանագիր կնքելու վերաբերյալ/:

բ. Երկրորդ, Համաձայն ՀՀ կառավարության 04.05.2017թ-ի թիվ 526-Ն որոշման 18-րդ կետի՝ Օրենքի 15-րդ հոդվածի 6-րդ մասի համաձայն գնում կատարվելու դեպքում գնումների պլանում գնման առարկան ներառվում է առանց գնման ընդհանուր գումարի նշման՝ ֆինանսական միջոցներ նախատեսվելուց հետո գնման պլանում համապատասխան լրացում կատարելու պայմանով: Ընդ որում, համապատասխան ֆինանսական միջոցներ նախատեսվելու օրվան հաջորդող երկու աշխատանքային օրվա ընթացքում պատվիրատուն սահմանված կարգով փոփոխություն է կատարում գնումների պլանում, իսկ պայմանագրով նախատեսված ապրանքների մատակարարման, աշխատանքների կատարման կամ ծառայությունների մատուցման նպատակով համաձայնագիր կնքելու ծանուցումը և կնքվելիք համաձայնագրի նախագիծը պայմանագիրը կնքած անձին է ուղարկում գնումների պլանում փոփոխությունը կատարվելու օրվանից տասնհինգ աշխատանքային օրվա ընթացքում:

Քանի որ պատվիրատուն սահմանված կարգով փոփոխություն չի կատարել իր գնումների պլանում, հետևաբար իրավունք չունի ուղարկելու մեզ համաձայնագրի նախագիծ:

Կից ներկայացնում ենք պատվիրատուի գնումների պանը, որտեղ հստակ երևում է, որ 1-ին չափաբաժինների մասով դեռևս ֆինանսական միջոցներ նախատեսված չեն, հետևաբար անգամ խոսք գնալ չէր կարող համաձայնագիր կնքելու վերաբերյալ:

22.07.2020թ-ին Պատվիրատուն իր թիվ 5 արձանագրությունով գնման ընթացակարգը 1-ին չափաբաժնի մասով հայտարարել է չկայացած»:

Ամփոփելով վերոգրյալը՝ Ընկերությունը խնդրել է.

ա. անվավեր ճանաչել պատվիրատուի թիվ 5 արձանագրությունով գնման ընթացակարգը 1-ին չափաբաժնի մասով չկայացած հայտարարելու մասին որոշումը:

բ. պարտադրել պատվիրատուին 1-ին չափաբաժինների մասով պայմանագիր կնքել «Աբամա Թրեյդ» ՍՊԸ-ի հետ:

Ընկերության տնօրենը, պատշաճ ծանուցված լինելով բողոքի քննության նպատակով 04.08.2020թ. ժամը 10:10-ին հրավիրված նիստի վերաբերյալ, մասնակցել է նիստին և պնդել բողոքով ներկայացվածը:

**2. «Վ.Ա. Ֆանարջյանի անվան ուռուցքաբանության ազգային կենտրոն» ՓԲԸ-ի կողմից բողոքի վերաբերյալ ներկայացված դիրքորոշումը և հիմնավորումները.**

«Վ.Ա. Ֆանարջյանի անվան ուռուցքաբանության ազգային կենտրոն» ՓԲԸ-ի կողմից (հետայսու նաև՝ Պատվիրատու) Գնումների հետ կապված բողոքներ քննող անձի սույն որոշումը կայացնելու օրվա դրությամբ գրավոր դիրքորոշում չի ներկայացվել:

Պատվիրատուն, պատշաճ ծանուցված լինելով բողոքի քննության նպատակով 04.08.2020թ. ժամը 10:10-ին հրավիրված նիստի վերաբերյալ, չի ապահովել իր ներկայացուցչի մասնակցությունը նիստին:

**3. ԳԲՔԱ-ՆԳ-2020/66 բողոքի քննության համար էական նշանակություն ունեցող փաստերը.**

ԳԲՔԱ-ՆԳ-2020/66 բողոքի քննության համար էական նշանակություն ունեն հետևյալ փաստերը.

1. «Վ.Ա. Ֆանարջյանի անվան ուռուցքաբանության ազգային կենտրոն» ՓԲԸ-ի կարիքների համար դեղորայքի ձեռքբերման նպատակով հայտարարվել է «ՈւԱԿ-ԲՄԱՊՁԲ-20/65» ծածկագրով բաց մրցույթ (հետայսու նաև՝ Ընթացակարգ), որի հայտարարությունը և հրավերը տեղեկագրում ([www.procurement.am](http://www.procurement.am) հասցեով գործող [ինտերնետային կայք](http://www.procurement.am)) հրապարակվել են **20.05.2020թ.**:

2. «Վ.Ա. Ֆանարջյանի անվան ուռուցքաբանության ազգային կենտրոն» ՓԲԸ-ի կողմից կազմակերպված «ՈւԱԿ-ԲՄԱՊՁԲ-20/65» ծածկագրով ընթացակարգի շրջանակում ձեռք բերվող գնման առարկայի մասով հաստատված գնումների պլանը (գնման առարկան ներառված առանց գնման ընդհանուր գումարի նշման) տեղեկագրում հրապարակվել է **18.05.2020թ.**:

**4. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով «Աբամա Թրեյդ» ՍՊԸ-ի՝ 30.07.2020թ. բողոքը և համանման բողոքը՝ կից փաստաթղթերով, ինչպես նաև գործով առկա փաստաթղթերը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 2-րդ հոդվածի 1-ին մասի 14-րդ կետը սահմանում է, որ **տեղեկագիրը** նույն օրենքով նախատեսված հրատարակման ենթակա տեղեկատվության հրապարակման նպատակով [www.procurement.am](http://www.procurement.am) հասցեով գործող ինտերնետային կայքն է:

Օրենքի 15-րդ հոդվածի 3-րդ մասի համաձայն՝ **գնումների պլանը, ներառյալ՝ փոփոխությունները**, հաստատվելուն հաջորդող երկու աշխատանքային օրվա ընթացքում պատվիրատուն **հրապարակում է տեղեկագրում**, բացառությամբ պետական գաղտնիք պարունակող գնումների պլանի:

Նույն հոդվածի 6-րդ մասի համաձայն՝ մինչև ֆինանսական միջոցներ նախատեսվելու սույն օրենքով սահմանված կարգով կարող է կնքվել պայմանագիր՝ պայմանով, որ դրա շրջանակներում գնում կարող է կատարվել անհրաժեշտ ֆինանսական միջոցներ նախատեսվելու դեպքում: Սույն մասի համաձայն կնքված պայմանագիրը լուծվում է, եթե այն կնքելու օրվան հաջորդող վեց ամսվա ընթացքում պայմանագրի կատարման համար ֆինանսական միջոցներ չեն նախատեսվել:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի համաձայն՝

1. Պայմանագիր կնքվում է գնահատող հանձնաժողովի որոշման հիման վրա՝ պատվիրատուի կողմից:

2. Սույն օրենքի 10-րդ հոդվածով սահմանված անգործության ժամկետը լրանալուն հաջորդող չորս աշխատանքային օրվա ընթացքում պատվիրատուն ծանուցում է ընտրված մասնակցին՝ ներկայացնելով պայմանագիր կնքելու առաջարկը և պայմանագրի նախագիծը: Ընդ որում, պայմանագիրը կարող է կնքվել ոչ շուտ, քան սույն օրենքի 10-րդ հոդվածով սահմանված անգործության ժամկետը լրանալու օրվան հաջորդող երկրորդ աշխատանքային օրը:

3. Եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի

ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրը ստորագրելու իրավունքից:

«Կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 18-րդ կետի համաձայն՝ Օրենքի 15-րդ հոդվածի 6-րդ մասի համաձայն գնում կատարվելու դեպքում գնումների պլանում գնման առարկան ներառվում է առանց գնման ընդհանուր գումարի նշման՝ ֆինանսական միջոցներ նախատեսվելուց հետո գնման պլանում համապատասխան լրացում կատարելու պայմանով: Ընդ որում, համապատասխան ֆինանսական միջոցներ նախատեսվելու օրվան հաջորդող երկու աշխատանքային օրվա ընթացքում պատվիրատուն սահմանված կարգով փոփոխություն է կատարում գնումների պլանում, իսկ պայմանագրով նախատեսված ապրանքների մատակարարման, աշխատանքների կատարման կամ ծառայությունների մատուցման նպատակով համաձայնագիր կնքելու ծանուցումը և կնքվելիք համաձայնագրի նախագիծը պայմանագիրը կնքած անձին է ուղարկում գնումների պլանում փոփոխությունը կատարվելու օրվանից տասնհինգ աշխատանքային օրվա ընթացքում:

Կարգի 32-րդ կետի 10-րդ ենթակետի համաձայն՝ եթե գնման ընթացակարգը կազմակերպվել է օրենքի 15-րդ հոդվածի 6-րդ մասի հիման վրա, և պայմանագիրը կնքելու իրավասության առաջացման պահին նախատեսված չեն ֆինանսական միջոցներ, ապա որակավորման և պայմանագրի ապահովումները ներկայացվում են միակողմանի հաստատված հայտարարության՝ տուժանքի կամ կանխիկ փողի ձևով: Եթե պայմանագիրը կնքելու իրավասության առաջացման պահին՝

ա. նախատեսված ֆինանսական միջոցները գերազանցում են գնումների բազային միավորի տասնապատիկը, սակայն պայմանագրի ամբողջական կատարման համար հետագայում ևս պահանջվում են ֆինանսական միջոցներ, ապա պայմանագրի ապահովումը, հատկացված ֆինանսական միջոցների մասով, ներկայացվում է բանկային երաշխիքի կամ կանխիկ փողի, իսկ պահանջվող ֆինանսական միջոցների մասով՝ միակողմանի հաստատված հայտարարության՝ տուժանքի կամ կանխիկ փողի ձևով,

բ. նախատեսված են ֆինանսական միջոցներ, ապա որակավորման ապահովումը հատկացված ֆինանսական միջոցների չափով ներկայացվում է բանկային երաշխիքի կամ կանխիկ փողի ձևով, իսկ հետագայում պահանջվող ֆինանսական միջոցների մասով



ապահովումը ներկայացվում է միակողմանի հաստատված հայտարարության՝ տուժանքի կամ կանխիկ փողի ձևով:

Կարգի 32-րդ կետի 12-րդ և 13-րդ ենթակետերի համաձայն՝

12) ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը:

13) ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Այսպես՝ «Վ.Ա. Ֆանարջանի անվան ուռուցքաբանության ազգային կենտրոն» ՓԲԸ-ի կարիքների համար դեղորայքի ձեռքբերման նպատակով հայտարարվել է «ՈւԱԿ-ԲՄԱՊՁԲ-20/65» ծածկագրով բաց մրցույթ, որին մասնակցելու նպատակով, ի թիվս այլ մասնակիցների, հայտ է ներկայացրել «Աբամա Թրեյդ» ՍՊԸ-ն:

Ընթացակարգի գնահատող հանձնաժողովի՝ 15.06.2020թ. թիվ 4 արձանագրության համաձայն՝ «Աբամա Թրեյդ» ՍՊԸ-ն 1-ին, 4-րդ և 5-րդ չափաբաժինների մասով ճանաչվել է ընտրված մասնակից և Ընթացակարգի գնահատող հանձնաժողովի կողմից որոշում է կայացվել վերջինիս պայմանագիր կնքելու առաջարկ ներկայացնելու վերաբերյալ:

Ընթացակարգի գնահատող հանձնաժողովի՝ 22.07.2020թ. թիվ 5 արձանագրության համաձայն՝ անգործության ժամկետի ավարտից հետո՝ 30.06.2020թ. Պատվիրատուն պայմանագիր կնքելու վերաբերյալ ծանուցում է ուղարկել Մասնակցին՝ կցելով պայմանագրի և ֆինանսական միջոցներ նախատեսվելու վերաբերյալ համաձայնագրի նախագծերը, ինչպես նաև բանկային երաշխիքի տեսքով՝ պայմանագրի և որակավորման ապահովումների օրինակելի ձևերը:

Նույն արձանագրության համաձայն՝ պայմանագրի և որակավորման ապահովումները բանկային երաշխիքի տեսքով անհրաժեշտ էր ներկայացնել, ֆինանսական միջոցներ նախատեսվելու վերաբերյալ համաձայնագիրը Մասնակցին ուղարկելու օրվանից հաշված 15 աշխատանքային օրվա ընթացքում, այսինքն՝ մինչև 21.07.2020թ., սակայն

պայմանագրի և որակավորման ապահովումները բանկային երաշխիքի տեսքով նշված ժամանակահատվածում չի ներկայացվել Պատվիրատուին:

Նույն արձանագրության համաձայն՝ հաշվի առնելով վերոգրյալը՝ «Աբամա Թրեյդ» ՍՊԸ-ն զրկվել է պայմանագիր կնքելու իրավունքից:

Գնումների հետ կապված բողոքներ քննող անձը ԳԲՔԱ-ՆԳ-2020/66 ծածկագրով բողոքի քննության շրջանակներում դիմել է Պատվիրատուին՝ խնդրելով տրամադրել Ընթացակարգի շրջանակում ձեռք բերվող ապրանքների մասով հաստատված գնումների պլանը տեղեկագրում հրապարակված լինելը հավաստող կայքից արտատպված փաստաթուղթը:

Պատվիրատուի կողմից 17.08.2020թ. թիվ 01/10-114 գրությամբ տրամադրվել է ձեռք բերվող ապրանքների մասով հաստատված գնումների պլանը տեղեկագրում հրապարակված լինելը հավաստող կայքից արտատպված փաստաթուղթը, ինչպես նաև նշված գրությամբ Պատվիրատուն հայտնել է հետևյալը.

««Վ.Ա. Ֆանարջանի անվան ուռուցքաբանության ազգային կենտրոն» ՓԲԸ-ի կողմից կազմակերպված «ՈւԱԿ-ԲՄԱՊՁԲ-20/65» ծածկագրով բաց մրցույթի շրջանակում գնման առարկայի մասով 14.05.2020թ. հաստատված գնումների պլանը տեղեկագրում (procurement.am) հրապարակվել է 18.05.2020թ.:

**Մրցույթը կազմակերպվել է առանց ֆինանսական միջոցների առկայության:**

**Անգործության ժամկետի ավարտից հետո ընտրված մասնակիցը ծանուցվել է ֆինանսական միջոցների առկայության մասին, առանց գնումների պլանի փոփոխության»:**

Այսպիսով՝ Պատվիրատուի 17.08.2020թ. թիվ 01/10-114 գրության, ինչպես նաև գործում առկա փաստաթղթերի ուսումնասիրության արդյունքում արձանագրում եմ, որ **Պատվիրատուի կողմից «ՈւԱԿ-ԲՄԱՊՁԲ-20/65» ծածկագրով ընթացակարգը կազմակերպվել է Օրենքի 15-րդ հոդվածի 6-րդ մասի համաձայն, ուստի պայմանագրի կարարման համար անհրաժեշտ ֆինանսական միջոցների առկայության դեպքում, ղեկավարվելով Կարգի 18-րդ կետով, Պատվիրատուն սահմանված կարգով պետք է փոփոխություն կարարի գնումների պլանում և նոր միայն սահմանված կարգով Ընկերությանը ծանուցի պայմանագրի և որակավորման ապահովումները բանկային երաշխիքի կամ կանխիկ փողի ձևով ներկայացնելու վերաբերյալ:**

Հաշվի առնելով վերոնշվածը՝ գտնում եմ, որ Պատվիրատուն «ՈւԱԿ-ԲՄԱՊՁԲ-20/65» ծածկագրով գնման ընթացակարգի շրջանակներում խախտել է Օրենքի 15-րդ հոդվածի 3-րդ մասով և Կարգի 18-րդ կետով սահմանված պահանջները:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝

**Ո Ր Ո Շ Ե Ց Ի**

«Աբամա Թրեյդ» ՍՊԸ-ի կողմից 30.07.2020թ. ներկայացված բողոքը և համանման բողոքը բավարարել մասնակի.

1. Պարտավորեցնել «ՈւԱԿ-ԲՄԱՊՁԲ-20/65» ծածկագրով բաց մրցույթի գնահատող հանձնաժողովին դադարեցնել 22.07.2020թ. թիվ 5 արձանագրությամբ գնման ընթացակարգը 1-ին չափաբաժնի մասով չկայացած հայտարարելու մասին և 4-րդ ու 5-րդ չափաբաժինների մասով համապատասխանաբար «Վիգ ֆարմ» ՍՊԸ-ին, «Գեղամ Կիրակոսյան» ՍՊԸ-ին ընտրված մասնակից ճանաչելու վերաբերյալ որոշումները:

2. Բողոքի և համանման բողոքի պահանջները՝ պարտավորեցնել պատվիրատուին 1-ին, 4-րդ և 5-րդ չափաբաժինների մասով պայմանագիր կնքել «Աբամա Թրեյդ» ՍՊԸ-ի հետ, մերժել:

ՀՀ գնումների հետ կապված բողոքներ քննող անձի որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ գնումների հետ կապված բողոքներ քննող անձի որոշումն ուժի մեջ է մտնում այն տեղեկագրում հրապարակելուն հաջորդող օրվանից:

**Գնումների հետ կապված  
բողոքներ քննող անձ՝**



**ԳՐԻԳՈՐ ՆԵՐՍԻՍՅԱՆ**